


ILUMINASI SANUBARI

PEDOMAN INDAH AGAR HIDUP LEBIH CERAH



ABRAZ TALDERI



BAYTUL HIKMA



ILUMINASI SANUBARI


PEDOMAN INDAH AGAR HIDUP LEBIH CERAH



Cetakan Pertama (2015)

ILUMINASI SANUBARI

PEDOMAN INDAH AGAR HIDUP LEBIH CERAH



ABRAZ TALDERI



BAYTUL HIKMA



BAYTUL HIKMA (PG0355779-V)

Pulau Pinang, Malaysia.

baytulhikma.blogspot.com

baytulhikma2014@gmail.com

facebook.com/BaytulHikma2014

+6013 218 1421

ILUMINASI SANUBARI :

Pedoman Indah Agar Hidup Lebih Cerah

© ABRAZ TALDERI, 2015

Cetakan Pertama, 2015

Hakcipta Terpelihara.

*Tidak dibenarkan mengeluarkan ulang mana-mana
bahagian buku ini dalam apa-apa bentuk melalui apa-apa cara
sekali pun, melainkan setelah mendapat keizinan bertulis
secara rasmi daripada Baytul Hikma.*

KANDUNGAN

KATA PENGANTAR	1
BAB 1 : <i>Amanat Sufyan As-Sauri</i>	5
BAB 2 : <i>Anak & Adat</i>	13
BAB 3 : <i>Bekalan Hidup Abadi</i>	17
BAB 4 : <i>Belum Tentu Lagi</i>	21
BAB 5 : <i>Demi Hari Ini</i>	30
BAB 6 : <i>Lusa Hari Kiamat</i>	34
BAB 7 : <i>Inilah Jiwa Merdeka</i>	39
BAB 8 : <i>Jadilah Seperti Air</i>	43
BAB 9 : <i>Keburukan & Kebaikan</i>	47
BAB 10 : <i>Kebanggaan Ibu Bapa</i>	57
BAB 11 : <i>Keluasan Makna Hikmah</i>	63
BAB 12 : <i>Lakukan Sekarang Juga</i>	80
BAB 13 : <i>Masa Untuk Keluarga</i>	86
BAB 14 : <i>Mencari Kebahagiaan Hakiki</i>	92
BAB 15 : <i>Natijah Sambil Lewa</i>	98

BAB 16 : <i>Nilai Seratus Dolar</i>	101
BAB 17 : <i>Optimis Atau Pesimis</i>	106
BAB 18 : <i>Pencuri, Penagih & Pembunuh</i>	115
BAB 19 : <i>Putera Yang Fakir</i>	120
BAB 20 : <i>Lepaskan Genggaman Tali</i>	129
BAB 21 : <i>Rahsia Perangsang Kejayaan</i>	137
BAB 22 : <i>Serangan Angin Kencang</i>	143
BAB 23 : <i>Soalan Tiga Penapis</i>	148
BAB 24 : <i>Solat Tiang Agama</i>	153
BAB 25 : <i>Tanda Kasih Sayang</i>	159
BAB 26 : <i>Tiga Lelaki Tua</i>	164

KATA PENGANTAR

Assalamu 'alaikum warahmatullahi wabarakatuh.

Alhamdulillah, segala pujian dan pujaan bagi Allah Tuhan sekalian alam. Selawat serta salam ke atas sebaik-baik ciptaan, Nabi Muhammad *Sollallahu 'alahi wa 'ala alihi wasohbihi wasallam.*

Bersyukur ke hadrat Allah, dengan sifat Ar-Rahman dan Ar-Rahim, sehingga hari ini kita masih mengecapi rahmat dan nikmat yang tidak terhingga banyaknya. Bersyukur kepada-Nya yang menganugerahkan penglihatan, pendengaran, percakapan, perbuatan, dan perasaan. Bersyukur juga kepada-Nya yang memberi saya kesempatan, kekuatan, dan pengetahuan untuk menyiapkan buku ini.

Illuminasi berasal daripada Bahasa Inggeris, *illumination*. Ia disebut dalam Bahasa Arab sebagai *tanwir*, yang bermaksud pencahayaan, penyinaran, ataupun penerangan. Sanubari pula berasal daripada Bahasa Arab *sonaubari* iaitu pokok pain, ia

digunakan untuk membuat perabot dan juga sebagai perhiasan. Ia menjadi kiasan kepada jantung hati oleh kerana bentuknya yang seakan-akan jantung. Iluminasi Sanubari sama ertinya dengan *Tanwirul-Qulub*, Pencahayaan Hati, Penyerinaran Jiwa, atau Penerangan Rohani.

Kisah-kisah yang saya sajikan dalam buku ini adalah berbentuk motivasi bagi membangkitkan kesedaran diri. Saya mengalihbahasakan daripada Bahasa Arab kepada Bahasa Melayu berserta penambahan buah fikiran daripada saya.

Wujud olahan bahasa dan adaptasi yang diseraskan mengikut kesesuaian masyarakat Malaysia khususnya. Berlaku juga pengubahan, tetapi kesahihan cerita asal tidaklah ditukar sama sekali. Corak penulisannya hampir serupa dengan buku saya yang berjudul *Aku Pemaksiat : Antologi Kisah Keinsafan Dari Tanah Arab*.

Tidak dinafikan beberapa kisah yang terdapat dalam buku ini telah diterjemahkan ke dalam bahasa lain seperti Bahasa Inggeris, Bahasa Indonesia, dan lain-lain bahasa. Ia menjadi tinjauan saya selain teks Bahasa Arab sebagai sumber asal, kerana versi yang ditulis dalam

Bahasa Arab terdapat sedikit kelainan, maka saya memutuskan untuk mengekalkan versi tersebut.

Manakala beberapa kisah yang lain pula masih tiada lagi terjemahannya melainkan hanya ditulis dalam Bahasa Arab, maka saya berbesar hati ingin mengetengahkan kepada anda semua.

“Sesungguhnya Allah tidak mengubah sesuatu kaum melainkan mereka mengubah diri mereka sendiri.”

Mudah-mudahan usaha saya ini dapat menjalar sebagai rekayasa kepada perubahan minda umat, selain menjadi titik tolak ilham dan idea dalam urusan seharian. Seterusnya pembaca sekalian dapat menjadi ejen pengubah paradigma yang jumud lagi terbantut, yang berlegar-legar dalam budaya masyarakat kita. Ia tidak lain dan tidak bukan, bertujuan menjurus ke arah kehidupan yang lebih maju, berwawasan, dan diberkati.

Semoga ia menjadi amal jariah yang berpanjangan di dunia dan akhirat.

Akhir sekali, saya lakarkan sebuah penghargaan kepada ibu bapa saya yang selalu mendoakan kejayaan saya, juga kepada semua

yang terlibat secara langsung dan tidak langsung dalam menjayakan penerbitan buku ini. Saya doakan keampunan untuk semua umat Islam dari kalangan jin dan manusia seluruhnya, dari awal kejadian sehingga ke hari pengakhiran. *Amin.*

Sekian, wassalam.

ABRAZ TALDERI

21 September 2015,

Kajang.

BAB

3

Bekalan Hidup Abadi

ILUMINASI 1 : *Belilah dirimu, kerana pasaran dan harganya sentiasa ada.*

– Ibnu Al-Qayyim

Suatu hari, seorang raja memanggil tiga orang menterinya, beliau memberi satu arahan yang tidak pernah disuruh sebelumnya. Setiap menteri perlu mengambil sekarung guni

kemudian pergi ke kebun-kebun istana, setiap menteri perlu mengisinya dengan buah-buahan yang terbaik untuk dipersembahkan kepada sang raja. Setiap menteri tidak boleh membantu dan meminta bantuan daripada menteri yang lain. Menteri-menteri itu berasa pelik akan arahan raja ini, namun mereka patuh saja melakukannya.

Menteri pertama mencari dengan tekun supaya sang raja gembira akan hasilnya, dia mengumpulkan buah-buahan yang paling sedap dan berkualiti sehingga guninya penuh.

Menteri kedua sebaliknya, dia tidak mengambil buah-buahan yang terbaik, kerana menganggap arahan sang raja bukanlah untuk kepentingan dirinya, tetapi untuk orang lain. Guninya penuh dengan buah-buahan yang bercampur antara yang baik dan kurang baik.

Menteri ketiga pula memperlekehkan arahan sang raja, guninya diisi dengan rumput-rumput, daun-daun, dan tumbuhan-tumbuhan lain.

Pada hari berikutnya, ketiga-tiga mereka datang dengan menunjukkan guni masing-masing. Setelah menyaksikan hasil mereka, sang

raja mengarahkan pengawal memenjarakan ketiga-tiga menteri itu tanpa soal bicara.

Di dalam penjara, mereka tidak dibekalkan apa-apa makanan melainkan guni masing-masing yang dibawa pulang itu sebagai bekalan tiga bulan pemenjaraan mereka.

Menteri pertama hidup senang-lenang dalam kurungannya, buah-buahan dalam guninya cukup untuk membuatnya bertahan selama tiga bulan.

Menteri kedua dapat bertahan juga selama tiga bulan, tetapi keadaan dirinya agak sempit dan serba kekurangan kerana buah-buahannya banyak yang menjadi busuk dan tidak boleh dimakan.

Menteri ketiga pula mati kelaparan tidak sampai sebulan.

Begitulah analoginya kehidupan kita di dunia ini sebagai tempat bercucuk tanam, dan di akhirat nanti adalah tempat menuai hasil. Allah adalah raja segala raja. Dia memerintahkan supaya kita beramal kepada-Nya dengan sebaik-baiknya. Maka rugilah sesiapa yang lalai dan ingkar. *Na'uzubillah.*

ILUMINASI 2 : Mereka yang sentiasa memilih jalan mudah, selamanya tidak akan sampai ke destinasi, bahkan diri mereka akan bersendirian di suatu sudut lain di hujung jalan.

ILUMINASI 3 : Masa depan dimiliki oleh mereka yang berusaha.



BAB

4

Belum Tentu Lagi

ILUMINASI 1 : *Boleh jadi sesuatu yang kalian benci itu adalah baik untuk kalian, dan boleh jadi sesuatu yang kalian suka itu adalah buruk untuk kalian. Dan Allah itu Maha Mengetahui sedangkan kalian tidak mengetahui.*

– Al-Baqarah : 216

KISAH SATU

Alkisah seorang lelaki tua tinggal di atas bukit kecil, dia mempunyai seekor kuda lumba yang amat disayanginya. Suatu hari kudanya itu hilang entah ke mana, lalu datang jiran-jiran kepadanya ingin mengucapkan takziah di atas nasib tidak baik yang menyimpannya.

“Mana kalian tahu ini adalah nasib buruk?” kata si lelaki itu tanpa rasa sedih sedikit pun.

Beberapa hari kemudian kudanya itu pulang kepadanya. Bukan bersendirian. Malah bersamanya ada beberapa ekor kuda lagi yang gagah mantap, lalu jiran-jirannya datang ingin mengucapkan tahniah kepadanya di atas berita gembira itu.

Dengan tanpa rasa gembira sedikit pun si lelaki itu berkata, “Mana kalian tahu ini adalah nasib baik?”

Beberapa minggu berikutnya, anak lelaki tersebut bermain salah seekor kuda gagah itu sehingga menyebabkan dirinya jatuh, lalu kakinya patah. Jiran-jiran yang mendengar berita tersebut datang kepadanya ingin mengucapkan takziah di atas nasib buruk yang berlaku.

“Mana kalian tahu ini adalah nasib buruk?”
kata si lelaki itu tanpa gelisah.

Beberapa minggu seterusnya, telah berlaku peperangan di kawasan tersebut. Semuanya berperang melainkan si anak yang patah kakinya, dia dikecualikan daripada berperang kerana keadaan kakinya yang parah. Akhirnya, ramai yang terkorban, termasuklah jiran-jiran yang datang berjumpa lelaki tua itu.

Demikianlah kisah nasib buruk yang kadang-kadang menjadi nasib baik dan nasib baik yang kadang-kadang menjadi nasib buruk.

KISAH DUA

Alkisah seorang raja mempunyai seorang menteri yang bijaksana, menteri ini sentiasa bersamanya ke mana saja si raja pergi.

Sepanjang kebersamaan itu dan setiap kali si raja ditimpa musibah menteri ini akan mengatakan “moga-moga ia suatu kebaikan”. Si raja tidak dapat bersabar akan sikap menteri yang satu ini. Sehingga suatu hari si menteri dipenjarakan dek kerana mengatakan ungkapan

itu pada peristiwa jari si raja putus.

Si raja marah sekali, “Apa yang baiknya jari beta terputus ini?!”

“Moga-moga ia suatu kebaikan,” si menteri masih dengan ungkapannya walaupun hukuman penjara dijatuhkan ke atasnya. Dia dipenjarakan dalam suatu tempoh yang agak lama.

Suatu hari, si raja keluar bersendirian tanpa pengawal untuk memburu. Pada suatu kawasan, si raja telah terperangkap dan tertangkap oleh sekumpulan penyembah berhala. Penangkapan si raja adalah untuk dijadikan korban kepada berhala yang disembah. Akan tetapi, setelah dikesan bahawa jari si raja cacat, mereka melepaskan si raja begitu sahaja.

Si raja amat bersukacita kerana selamat daripada menjadi mangsa sembelihan yang mengerikan itu. Perkara pertama yang dilakukan kerana syukur akan keselamatannya itu, si raja memerintahkan pengawal melepaskan si menteri daripada penjara. Si raja menyesal dan ingin meminta maaf di atas apa yang telah dilakukan. Sekarang ini baru dia tahu kebaikan terputusnya jarinya itu.

“Ketika beta mengarahkan kamu dipenjara, kamu mengatakan *moga-moga ia suatu kebaikan*. Apakah maksudmu akan kebaikan itu?” tanya si raja inginkan penjelasan.

Lalu si menteri bijaksana menjawab, “Kalau tuanku tidak memenjarakan saya, pasti sayalah yang akan menjadi mangsa korban tersebut.”

Benarlah katanya. Setiap ketentuan Allah itu ada kebaikannya.

KISAH TIGA

Alkisah empat orang lelaki bermusafir ke suatu tempat. Terdapat seorang lelaki soleh di antara mereka membawa beberapa ekor haiwan sebagai pembantu di sepanjang perjalanan tersebut, iaitu seekor ayam yang tugasnya mengejutkan ketika waktu Subuh, seekor anjing yang tugasnya mengawasi keselamatan ketika mereka sedang tidur, dan seekor keldai yang tugasnya membawa barang-barang keperluan.

Pada suatu hening fajar, kokokan ayam tidak pula kedengaran memecahkan kesunyian, kerana dimakan oleh sang ular yang kelaparan. Salah

seorang daripada mereka berkata, “Ini adalah musibah! Siapa yang akan kejutkan kita untuk solat Subuh selepas ini?”

“Jangan kata ia musibah, tiada siapa pun tahu hakikat sebenar sama ada ia musibah atau bukan. Moga-moga Allah lindungi kita,” tuan pemilik haiwan membalas pertanyaan.

Selang beberapa hari kemudian, apabila mereka bangun daripada tidur, anjing menerima nasib yang sama, mati dibaham serigala. Darah anjing tersebut dapat dikesan tidak jauh dari situ. Berkata pula salah seorang yang lain daripada mereka, “Saya tahu kamu ingin mengatakan ini adalah suatu kebaikan, betul tak? Kebaikan apakah semua ini?!”

Jawab tuan punya haiwan, “Ya benar. Ia adalah suatu kebaikan, tapi tiada siapa yang tahu akan hakikatnya. Moga-moga Allah lindungi kita semua.”

Pada beberapa hari berikutnya keldai pula menemui ajalnya. Lelaki ketiga di antara mereka mengeraskan suara, “Jangan kamu kata lagi ia adalah kebaikan! Sekarang ini kita yang kena bawa sendiri barang-barang, bukan lagi keldai, apakah

ini kebaikan?”

Lelaki soleh itu tersenyum sahaja, tiada sepetah perkataan pun keluar daripada peti suaranya.

Mereka meneruskan perjalanan. Dan tiba di suatu lembah di antara dua gunung yang tinggi, alangkah terkejutnya mereka berempat mendapati ada banyak kepala manusia bergelimpangan bersepah-sepah di serata tempat. Mereka adalah mangsa-mangsa bunuh oleh lanun yang berkeliaran di kawasan itu.

Tidak jauh daripada arah mereka itu, mereka ternampak satu kafilah, apabila satu kafilah lain yang lalu di situ mereka akan memberitahu bahawa di belakang lembah ini terdapat sekumpulan lanun yang membunuh sesiapa sahaja yang lalu.

Kini mereka pula mendekati kafilah itu. Mereka bertanya bagaimanakah lanun itu dapat mengesan keberadaan kafilah yang lalu di lembah ini sedangkan mereka di belakang sana. Mereka memberitahu sama ada daripada bunyi ayam, anjing, atau keldai.

Si lelaki soleh bertanya kepada sahabat-

sahabatnya yang lain, “Apakah pendapat kamu semua selepas dengar berita ini?”

Mereka semua menjawab, “Benarlah sangkaan kamu. Kami tidak akan lagi berkata melainkan ia adalah kebaikan, kebaikan, dan kebaikan.”

Seseorang yang memandang kepada hikmah, pasti dia tidak akan bersedih ataupun bergembira secara melampau kerana dia tidak mengetahui hakikat sebenarnya sama ada keburukan yang nyata atau kebaikan yang tersembunyi. Apa yang perlu dilakukan adalah sentiasa bersyukur di atas setiap pemberian dan sentiasa bersabar di atas setiap kehilangan.

Janganlah bergembira semata-mata oleh kebaikan yang dimiliki, barangkali ia adalah jalan untuk menuju keburukan. Begitulah juga sebaliknya.

Orang yang sebenar-benar gembira adalah orang yang mampu mempraktikkan intipati reda dalam apa jua qadak dan qadar.

Dalam satu hadis riwayat Muslim, Rasulullah

Sollallahu ‘alaihi wasallam bersabda; Sungguh ajaib seorang mukmin yang semua urusannya adalah kebaikan. Keajaiban ini tiada pada sesiapa melainkan pada seorang mukmin; iaitu apabila dikurniakan kebaikan, dia bersyukur, sungguh ia adalah kebaikan baginya. Dan apabila ditimpakan keburukan, dia bersabar, sungguh ia adalah kebaikan baginya.^[1]

ILUMINASI 2 : *Raja dan wali yang sebenar di dunia ini adalah; apabila daratan, lautan, bumi, batuan, dan bandaran menjadi emas dan perak bagi mereka. Jin, manusia, haiwan ternakan, dan burung-burung tunduk kepada mereka. Mereka tidak menghendaki melainkan apa yang Allah kehendaki, dan pastinya apa yang Allah kehendaki itu menjadi kenyataan. Mereka tidak gentar pada makhluk bahkan makhluk yang gentar kepada mereka. Mereka hanya berkhidmat kepada Allah dan setiap makhluk berkhidmat kepada mereka. Raja manakah di dunia yang sehebat martabat ini? Kebanyakan mereka adalah lebih rendah dan lebih hina.*

– Al-Imam Al-Ghazzali, kitab Minhajul-Abidin



¹ Muslim, no. 7692

BAB

22

Serangan Angin Kencang

ILUMINASI 1 : *Sesiapa yang mengatakan kepada kamu “Hal ini mustahil berhasil.” Seandainya dia memiliki banyak pencapaian, pasti dia tidak menggunakan perkataan ‘mustahil’ itu dengan semudahnya.*

– Napoleon Hill

Beberapa tahun dahulu, seorang pemilik

tanah pertanian di persisiran pantai sangat memerlukan tenaga kerja, tetapi ramai yang tidak mahu bekerja dengannya kerana bimbang angin kencang yang bertiup dari arah pantai itu. Telah dimaklumi bahawa pantai itu berombak kuat dan sering kali membantai segala binaan dan hasil pertanian.

Suatu ketika, pemilik tanah tersebut menemu duga pemohon-pemohon yang ingin bekerja dengannya, tetapi akhirnya dia sendiri menolak permohonan mereka. Seinggalah tiba seorang lelaki pendek yang kurus tubuhnya datang kepada pemilik tanah tersebut.

“Adakah kamu boleh bekerja dengan baik dalam bidang perladangan?” tanya pemilik tanah.

Lelaki kurus itu menjawab, “Ya, sayalah orang yang tidur ketika angin bertiup kencang.”

Disebabkan terlalu bingung akan jawapan yang diberikan, dia menerima sahaja lelaki itu bekerja tanpa berfikir lama.

Lelaki kurus itu memulakan kerjayanya dengan baik, dia sungguh tekun bekerja dari pagi hingga ke senja. Pemilik tanah itu menyukai kesungguhannya.

Suatu malam yang tidak diduga, angin kencang datang menyerang. Bunyi tiupan angin waktu itu seperti ngauman seekor harimau yang kelaparan. Pemilik tanah itu terbangun dari lenanya, terkejut dan terganggu dek kekencangan angin malam itu.

Segera dia pergi ke satu batu besar, di situlah tempat tidur si lelaki kurus. Dia menggerak-gerakkan lelaki itu untuk mengejutkannya, kemudian menjerit sekuatnya, “Bangun! Angin kencang sedang menyerang! Bangun cepat!! Selamatkan apa yang patut sebelum ia terbang dibawa angin!!”

Lelaki itu berbaring elok di atas katil, lalu menjawab, “Tidak wahai tuan! Bukankah saya telah katakan bahawa sayalah orang yang tidur ketika angin bertiup kencang.”

Kemarahan tuan pemilik tanah mendidih-didih mendengar jawapan balas daripada pekerjanya itu. Terlintas di fikirannya mahu saja menembak mati si lelaki kurus itu, untunglah dia tidak melakukannya kerana menghadapi kebingungan angin kencang.

Apabila pemilik tanah itu bergegas keluar

untuk menyelamatkan aset milikannya, alangkah terkejutnya didapati bahawa semua kandang tertutup rapi dengan penutup khasnya, burung-burung berada baik di dalam sangkar, dan tanah-tanah pertanian tidak tergugat oleh angin kencang. Pintu-pintu tertutup rapi dengan pencucuk-pencucuk besi, tingkap-tingkap juga kemas tertutup semua. Segalanya tertutup dengan baik, selamat daripada bahaman angin kencang.

Sekarang barulah dia faham apa yang dimaksudkan oleh pekerjaanya itu. Kemudian dia kembali ke tempat tidurnya, lalu tidur seperti biasa tatkala angin masih mengaktifkan serangan.

Begitulah. Sekiranya persediaan sudah disusun rapi, maka tiada apa lagi yang perlu ditakuti.

ILUMINASI 2 : *Matlamat adalah suatu mimpi yang kita ubah menjadi perancangan dan gerak-geri kerja untuk mencapai matlamat tersebut.*

– Zig Ziglar

ILUMINASI 3 : *Boleh jadi sebaik-baik kaedah adalah yang paling susah dan paling payah, tetapi anda haruslah sentiasa menempuhnya, kerana kebiasaan menghadapi kesusahan akan menjadikan yang lainnya tampak mudah sahaja.*

ILUMINASI 4 : *Sentiasalah melakukan yang betul, ia akan memaksa orang lain untuk melakukannya juga, dan menarik kekaguman yang lain-lain lagi.*

– Mark Twain

ILUMINASI 5 : *Perasaan tidak gentar merupakan titik permulaan hikmah.*

– Bertrand Russell



BAB

23

Soalan Tiga Penapis

ILUMINASI 1 : *Abaikan segala urusan yang tidak berkaitan denganmu, usah berkata-kata pada sesuatu yang tidak membabitkanmu, dan simpanlah lidahmu sepertimana kamu menyimpan helaian kertasmu.*

– Abdullah bin Amru

Pernahkah kamu bertanya; Mengapakah Socrates adalah seorang cendekiawan dan ahli

falsafah Yunani terkenal?

Suatu hari, ada seorang lelaki tergopoh-gapah menemui Socrates... lalu berlakulah perbualan berikut;

Lelaki : Tahukah kamu apa yang saya dengar tentang salah seorang murid kamu?

Socrates : Nanti dahulu, sebelum kamu mengkhabarkan berita tersebut, saya ingin kamu menjawab soalan 'Tiga Penapis'.

Lelaki : Tiga Penapis?

Socrates : Ya. Sebelum kamu mengajukan soalan mengenai murid saya, saya ingin mengetahui jawapan kamu. Penapis pertama ialah 'kebenaran'. Adakah kamu yakin bahawa berita yang bakal kamu khabarkan itu adalah suatu kebenaran?

Lelaki : Saya mendengar orang bercerita mengenainya, dan... (lalu diam)

Socrates : Baik. Sekarang kamu sendiri tidak pasti kebenaran berita yang kamu ingin sampaikan. Kita pergi ke penapis kedua iaitu 'kebaikan'. Adakah ada kebaikan pada berita mengenai murid saya itu?

Lelaki : Tidak. Bahkan sebaliknya.

Socrates : Baik. Kamu begitu tekad sekali ingin mengkhabarkan suatu berita yang kamu sendiri tidak pasti sama ada ia benar atau tidak.

Lelaki itu merasakan dirinya bersalah akan kehadirannya, lalu Socrates terus menyambung...

Socrates : Baik. Kamu ada peluang untuk menjawab penapis ketiga, iaitu 'faedah'. Adakah wujud faedah untuk saya dengan berita mengenai murid saya itu?

Lelaki : Tidak.

Socrates : Jadi, mengapa perlu kamu khabarkan kepada saya sesuatu yang tiada kebenaran, tiada kebaikan, dan tiada faedahnya?

ILUMINASI 2 : *Maka tahanlah lidahmu melainkan pada kebaikan.*^[24]

– Sahih Ibnu Hibban

ILUMINASI 3 : *Rasulullah ketika ditanya oleh seorang lelaki, Islam yang manakah lebih afdal? Jawab baginda; Apabila orang Islam selamat daripada kejahatan lidah dan tangan kamu.*^[25]

– Sahih Ibnu Hibban

ILUMINASI 4 : *Mu'az bin Jabal berkata bahawa Rasulullah mewasiatkan kepadaku : Peliharalah lidahmu.*^[26]

– Musnad al-Bazzar

²⁴ Ibnu Hibban, no. 374

²⁵ Ibnu Hibban, no. 180

²⁶ Al-Bazzar, no. 2643

ILUMINASI 5 : *Jagalah lidahmu kerana sesungguhnya ia pantas membunuh manusia, dan lidah inilah juga lambang kepada hati yang menunjukkan kebijaksanaan seseorang manusia.*

– Abdullah bin Al-Mubarak



BAB

26

Tiga Lelaki Tua

ILUMINASI 1 : *Sesiapa yang mahu memperolehi hasil, hendaklah memulakan dengan ‘memberi’.*

– Maisarah Tahir

Sebentar lagi akan masuk waktu solat Fardu Maghrib, ia menandakan waktu berbuka puasa bagi orang Islam seluruh dunia.

Seorang isteri tergerak hati untuk

memanggil tiga orang lelaki tua terbuka bersama-sama di rumahnya, dengan suami dan anak-anaknya, mereka itu telah diperhatikan sejak tadi berada di suatu kawasan yang tidak jauh daripada rumahnya.

Si suami yang sedang terlantar sakit menyuruh anaknya menjadi wakil bagi menjemput kehadiran mereka. Apa yang mengejutkan, mereka berkata hanya salah seorang sahaja daripada mereka dibenarkan untuk dipilih.

Apa yang peliknya lagi adalah nama-nama mereka. Seorang bernama Kejayaan, seorang lagi Kekayaan dan yang ketiga bernama Kasih Sayang.

Si anak pulang mengkhabarkan hal tersebut kepada ayahnya. Si suami berkata kepada isterinya, “Kalaulah ada di antara mereka yang bernama Kesihatan, sudah tentu saya akan mempelawa dia, dan meminta pertolongannya untuk menyembuhkan saya. Mungkin Kekayaan dapat menyembuhkan, panggillah Kekayaan.”

Secara spontan si isteri membidas, “Bagaimana mungkin Allah akan memberkati kekayaan tanpa pekerjaan? Tidak mungkin.”

“Baiklah, kalau begitu kita panggil Kejayaan,

sebab dengan pekerjaanlah kita akan dapat kejayaan,” si suami menukar pilihannya.

“Bukankah lebih baik kita mempelawa Kasih Sayang?” celah si anak.

Suami isteri itu saling memandang antara satu sama lain. “Baik. Kami ikut pilihan kamu wahai anak,” balas si suami.

Anak itu pun segera menemui tiga lelaki tua tadi. “Siapa di antara kalian yang bernama Kasih Sayang? Kami mempelawa tuan yang bernama Kasih Sayang,” seru si anak.

Tatkala lelaki tua yang bernama Kasih Sayang bangun untuk pergi ke rumah tersebut, dua orang lelaki lagi turut bangun untuk pergi bersama.

Si anak pelik melihat mereka. “Tadi kalian mengatakan hanya seorang sahaja yang dibenarkan untuk datang ke rumah saya, mengapa sekarang mengubah fikiran?” tanya si anak kehairanan.

“Jika kamu mempelawa Kekayaan atau Kejayaan sahaja, tentu seorang sahaja daripada kami akan pergi ke rumah kamu. Tapi kamu

mempelawa Kasih Sayang, ketahuilah bahawa di setiap kasih sayang, akan bersamanya kekayaan dan kejayaan,” jawab Kasih Sayang.

Kasih sayang merupakan sesuatu yang amat tinggi nilainya, untuk mendapatkannya kita hendaklah mendahului dengan sesuatu pemberian. Cuba lihat hadis qudsi ini dengan mata hati, mafhumnya;

“Tidaklah seorang hamba yang mendekati-Ku dengan sesuatu yang lebih Aku cintai daripada apa yang telah Aku wajibkan ke atasnya dan sentiasa mendekati-Ku dengan amalan sunat, melainkan Aku akan mencintainya. Apabila Aku mencintainya, Aku akan menjadi pendengaran yang dengannya ia mendengar, penglihatan yang dengannya ia melihat, tangan yang dengannya ia memukul, dan kaki yang dengannya ia berjalan.”^{29]}

Natijah cinta daripada Allah kepada seorang hamba akan menjadikan hamba itu memiliki apa yang dimahukannya, namun didahului dengan memberi ketaatan kepada amalan-amalan fardu,

^{29]} Al-Arba'in An-Nawawiyah, no. 38

sunat dan mendekatkan diri kepada-Nya. Hasil daripada pemberiannya itu, maka datanglah kejayaan dan kekayaan yang diredai oleh Allah. Dia tidak mendengar dan melihat melainkan apa yang diredai oleh Allah. Dia tidak berjalan dan melakukan sesuatu pekerjaan melainkan apa yang diredai oleh Allah.

Pemberian merupakan titik permulaan sebuah kasih sayang dan kecintaan. Mulakan hari kamu untuk Allah, bersama Allah, dengan zikrullah, kamu akan dapati hidup kamu penuh dengan kasih sayang dan kecintaan.

Kamu bangun tidur mengingati Allah, dan kamu tidur semula dengan mengingati Allah, kamu akan dapati pengakhiran hari kamu dengan kecintaan. Dan kamu bangun keesokan hari menjadi seorang yang mengamalkan senyuman, bertoleransi, bertolak ansur, bertimbang rasa, berperikemanusiaan dan menyebarkan bunga-bunga cinta.

ILUMINASI 2 : *Kemiskinan yang melarat di dunia ini akan lenyap keseluruhannya jika semua orang bermuamalah dengan hati.*


– Mustafa Sadiq ar-Rafi'i

ILUMINASI 3 : *Kecintaan sebenar terletak pada keredaan Tuhan.*





BAYTUL HIKMA



ILUMINASI SANUBARI

“Sebuah koleksi ucapan tokoh-tokoh, kata-kata hikmah dan kisah-kisah menarik sebagai panduan menjalani kehidupan di dunia yang sementara ini. Juga sebagai motivasi untuk membangunkan jiwa dan raga, serta menyedarkan kita tentang potensi diri manusia yang sangat hebat.”

